

## AL IMPEGNE I FIRMATARIS A SBURTÂ PAR POTENZIÂ LA LEÇ DI MÛT DI PROMOVI E VALORIZÂ LIS LENGHIS E LIS CÛLTURIS MINORIZADIS, MASSIME CHÊS DE REGJON



La Universitât dal Friûl e je tra i promotôrs dal document fat bon lunis ai 14 di Dicembar.

# Document a pro de 482

**Al è stât aprovât ae unanimitât dai presints ae convigne inmaneade dal Centri internazionâl sul plurilinguism e de Regjon tal decenâl de leç statâl. Al è viert a altris adesions**

**A** I 15 DI DICEMBAR a son stâts 10 agns di cuant che la leç statâl 482 e je stade dade fûr. Il test al jere stât fat bon dal Parlament talian ai 15 di Dicembar dal 1999 e po publicât su la Gazete Uficiâl ai 20 di Dicembar. A 10 agns di distance, parts impuartantis de leç no àn viodût atuazion: l'esempli plui clâr al è chel de presince des lenghis tuteladis de 482 tal servizi public radiotelevisif. E al preoche un grum il tai dai fonts che a varessin di permeti di meti in vore la leç. Cun cheste ande, tal 2010, cui bêçs a disposizion di dutis e dodis lis lenghis minorizadis tuteladis de 482 si podarà fâ ben pôc.

Dal probleme dai fonts par garantî la atuazion de leç 482 al à fevelât ancje l'assessor regionâl ae Culture, Roberto Molinaro, dilunc de convigne «Scuele e aministrazion publiche. I dîs agns de leç 482 su lis comunitâts linguistiche in Italie», che si è davuelte a Palaç Antonini a Udin, lunis ai 14 di Dicembar. L'incuintri, inmaneât dal Centri internazionâl sul plurilinguism de Universitât di Udin dutun cul assessorât regionâl ae Culture, al è stât un moment di confront jenfri stu-

diôs, parlamentârs, istituzions e rpresentants des minorancis.

La convigne e je stade ancje la ocazion par presentâ un document, che al vignarà mandât aes istituzions talianis e regionâls, promovût di Universitât di Udin, Provincie e Comun di Udin, Arcidiocesi di Udin e Comitât pe autonomie e il rilanc dal Friûl e aprovât ae unanimitât dai presints ae convigne. In chê sede, lu àn firmât 160 personis. Ma il document al è viert a altris adesions.

Te declarazion si sotlinie la impuartance de leç 482; il so jessi in armonie cul articul 6 de Costituzion taliane e cui principis pandûts di organisims europeans e internazionâi; la progressive diminuzion dai fonts pe sô atuazion (vuê a son un cuint di chei che a jerin sul prin) che e contraste cul articul 6 de Costituzion taliane. Si ricuarde la sentence de Cort Costituzionâl (n. 159 dal 2009) li che si dîs che la lenghe furlane «e je un element di identitât individuâl e coletive di impuartance basilâr» e che al è impuartant garantî «il dîrit a doprâ la lenghe tes relations istituzionâls, il dîrit ae istruzion ancje te lenghe mi-

noritarie, il sostegn ae culture de minorance».

Si ricuarde ancje che la presince des minorancis linguistiche slovene, furlane e todesce, ricognossudis de 482, e je une des resons di fonde de specialitât regionâl e une ricjece pal patrimoni linguistic e culturâl de Republiche taliane che al à bisugne di struments di tutele eficacs. Su la fonde di chestis, e altris considerazions, i firmataris dal document si impegnin a sostignî il potenziament de leç 482/99, di mût «che e sedi buine di sigurâ finanziaments adeguâts par promovi e valorizâ lis lenghis e lis culturis minoritariis, massime la lenghe furlane e lis altris lenghis de regjon» e «a assegnâ ae ativitât de Comission paritetiche Stât/Regjon, in sede di atuazion dal articul 3 dal Statût di autonomie e daûr dal percors mostrât te sentence de Cort Costituzionâl, di cjatâ ogni disposizion ritignude juste par rivâ a une moderne tutele de lenghe furlane e des altris lenghis minoritariis de regjon tant che materie fundamentâl pe Regjon tai setôrs de Universitât, de comunicazion istituzionâl e de publicitât dai ats destinâts ae regjon, de toponomastiche, te suaze des programazions radiofonichis e televisivis, ancje dal servizi public radiotelevisif, de istruzion».

**ERIKA ADAMI**